

Nowodhow an Seythen

28/10/08

Yma own bos kaletterow dhe dowl dastrehevel kresen Sen Ostel.

Derivas towl administration a wrug onan a'n kowethasow ow kul an ober war Blen Avon Wynn.

David McClean Holdings re omwodhevis kudynnnow awos studh an varhas anethow.

**

Konsel Kernow a garsa drehevel dew-vil chi ha seyth kans an vledhen... dres an ugens bledhen a dheu.

Kaskyrhoryon a grys an towl ma dhe gudha Kernow gans konkrit.

**

Yma own bos herdhoryon kewargh owth usya kytrinyow skol.

Warlergh an kreslu, ymons i owth yniya aga gwara war flehes.

Yma towl lemmyn a worra gwithysi gres yn kytrinyow yn-dann gell.

**

Fatel yllons degea moy es tri ugens lytherva Gernewek... saw dedhyow wosa leverel bos milvilvilyow spenys war selwel arhantiow?

Hemm yw govyn agan eseli senedh Westminster.

An parti Livwer a grys bos edhom dhe'n governans konvedhes pandra hwer y'n pow a-dro awos an degeansow.

**

An crunch kresys a godh war Ayr-ambo Kernow.

Yskynna re wrug an kost a neyja an karr klavji.

Pymp kans peuns an our o... lemmyn yth yw hwegh kans peuns.

Y teu an nowodhow ha'n gonis ow solempnya ugens mil galow a-bann dhalathas mil-naw-kans-seyth-ha-peswar-ugens.

**

An golow gwer yw res rag kloshe rannow bras a gonyow Pennwydh.

An Trest Kenedhlek hag Ertach Pow Sows a vynn gorra gwarthek war an tir may hallo bos peurhes an kaswydh, eythen ha'n reddden.

Byttegyns yma kaskyrgh rag y stoppya... awos bos own a lies grid, arwodh ha yet y'n gwylvos diwettha.

**

Rygbi...

An Vorladron a strivyas yn feur rag fetha Moseley orth Kammbron.

I a waynyas y'n diwettha mynysenow ...nownsek poynt dhe bymthek.

Lemmyn... seythves yns war rol Kenedhlek Onan.

Kenedhlek Dew ha Rysrudh a waynyas arta dre fetha Southend dewdhek-poynt-warn-ugens dhe seyth.. Byttegyns yth esa skruth dhe Bons Polson... Bay an Menydh a waynyas aga hynsa fit erbynn an Para Oll-Du.. Lannstefan a gollas hwegh poynt dhe eth.

**

Henn yw oll dhyworth Nowodhow an Seythen... goslow orth Radyo an Gernewegva an bennseythen ow tos ha klewes derivas dhyworth Pow Spayn.

Agas gweles.